

“ORDENANZA FISCAL Nº 26

REGULADORA DO IMPOSTO SOBRE ACTIVIDADES ECONÓMICAS

FUNDAMENTO LEGAL.

ARTIGO 1º.-

De conformidade có disposto no artigo 59.1 b) do RD Lexislativo 2/2004 de 5 de marzo polo que se aproba o texto refundido da Lei Reguladora das Facendas Locais, establécese o Imposto sobre actividades económicas.

Natureza e feito impositivo

Artigo 2º.

1.- O Imposto sobre Actividades Económicas, é un tributo directo de carácter real, no que o feito impositivo está constituído polo mero exercicio neste Concello de actividades empresariais, profesionais ou artísticas, exérganse ou non en local determinado e se atopan ou non especificadas nas tarifas do Imposto.

2.- Considéranse, aos efectos deste Imposto, actividades empresariais, cando teñan carácter independente, as gandeiras, extractivas, industriais, comerciais e de servizos. Non teñen, por conseguinte, tal consideración as actividades agrícolas, as gandeiras dependentes, as forestais e as pesqueiras, non constituíndo feito impositivo polo imposto o exercicio de calquera delas.

Ao efectos do previsto no parágrafo anterior, terá a consideración de actividade gandeira independente, o conxunto de cabezas de gando que se atope comprendido nalgún dos casos seguintes:

- a) Que se pade ou se alimente fundamentalmente en terras que non sexan explotadas agrícola ou forestalmente polo dono do gando.
- b) O estabulado fóra das fincas rústicas.
- c) O *trashumante* ou *trasterminante*.
- d) Aquel que se alimente fundamentalmente con pensos non producidos na finca na que se críe.

3.- Considérase que unha actividade se exerce con carácter empresarial, profesional ou artístico, cando supoña a ordenación por conta propia de medios de produción e/ou de recursos humanos, coa finalidade de intervir na produción ou distribución de bens ou servizos.

4.- O contido das actividades gravadas está definido nas tarifas do Imposto.

5.- O exercicio das actividades gravadas probarase por calquera medio admisíbel en dereito e, en particular, polos contemplados no Art. 3 do Código de Comercio.

Supostos de non suxeición

Artigo 3º.

Non constitúe feito impositivo neste imposto o exercicio das seguintes actividades:

1.- O alleamento de bens integrados no activo fixo das empresas, que figuraran debidamente inventariados como tal inmovilizado con máis de dous anos de antelación á data de transmitirse, e a venda de bens de uso particular e privado do vendedor sempre que os utilizara durante igual período de tempo.

2.- A venda dos produtos que se reciben en pagamento de traballos persoais ou servizos profesionais.

3.- A exposición de artigos co fin exclusivo de decoración ou adorno do establecemento.

Pola contra, estará suxeita ao imposto a exposición de artigos de agasallo aos clientes.

4.- Cando se trate de venda polo miúdo, a realización dun só acto ou operación illada.

Exencións

Artigo 4º.

1.- Estarán exentos do imposto:

a) O Estado, as Comunidades Autónomas, e as Entidades Locais, así como os seus organismos autónomos do Estado e as entidades de dereito público de análogo carácter das comunidades autónomas e das entidades locais..

b) Os Suxeitos Pasivos que inicien o exercicio da súa actividade en territorio español, durante os 2 primeiros anos impositivos deste imposto en que se desenvolva a mesma.

A estes efectos, non se considerará que se produciu o inicio do exercicio dunha actividade cando a mesma se teña desenrolado anteriormente baixo outra titularidade, circunstancia que entenderase que concorre, entre outros supostos, nos casos de fusión, escisión ou achega de ramas de actividade.

c) Os seguintes suxeitos pasivos:

- As persoas físicas.

- Os suxeitos pasivos do Imposto sobre Sociedades, as sociedades civís e as entidades do artigo 35.4 da Lei Xeral Tributaria 58/03, que teñan un importe neto de cifra de negocios inferior a 1.000.000 de euros.

- Os contribuíntes do Imposto sobre a Renda de non Residentes que operen en España mediante establecemento permanente, sempre que teñan un importe neto da cifra de negocios inferior a 1.000.000 euros.

Aos efectos de aplicación de exención prevista neste parágrafo teranse en conta as regras seguintes:

- O importe neto da cifra de negocios determinarase de acordo co previsto no artigo 191 do texto refundido da Lei de Sociedades Anónimas, aprobado polo Real Decreto Lexislativo 1564/1989, de 22 de decembro.

- O importe neto da cifra de negocios será, nos casos dos suxeitos pasivos do Imposto sobre Sociedades e dos contribuíntes polo Imposto sobre a Renda de non Residentes, o do período impositivo cuxo prazo de presentación de declaracións por ditos tributos tivera finalizado no ano anterior ao de reporte deste imposto. No caso das Sociedades Civís e as entidades ás que se refire o artigo 35.4 da nova Lei Xeral Tributaria 58/03 de 17 de decembro, o importe neto da cifra de negocios será o que corresponda ao penúltimo ano anterior ao de reporte deste imposto. Se dito período tivera unha duración inferior ao ano natural, o importe neto da cifra de negocios elevarase ao ano.

-Para o cálculo do importe da cifra de negocios do suxeito pasivo, terase en conta o conxunto das actividades económicas exercidas polo mesmo. Porén, cando a entidade forme parte dun grupo de sociedades, no sentido do Art. 42 do Código de Comercio, o importe neto da cifra de negocios referirase ao conxunto de entidades pertencentes a dito grupo. A estes efectos, entenderase que os casos do Art. 42 do Código de Comercio son os recollidos na sección I do Capítulo I das Normas para a formulación das contas anuais consolidadas aprobadas polo R.D. 1815/1991, de 20 de decembro. No suposto dos contribuíntes polo Imposto sobre a Renda de non Residentes, atenderase ao importe neto da cifra de negocios imputábel ao conxunto dos establecementos permanentes situados no territorio español.

d) As Entidades Xestoras da Seguridade Social e de Mutualidades de Previsión Social reguladoras pola Lei 30/1995, de 8 de novembro, de ordenación e supervisión dos Seguros Privados.

e) Os organismos públicos de investigación, os establecementos de ensino de todos os graos, custeados integramente con fondos do Estado, das Comunidades Autónomas, ou das Entidades Locais, ou por Fundacións declaradas benéficas ou de utilidade pública, e os establecementos de ensino de todos os graos que, carecendo de ánimo de lucro, estiveran en réxime de concerto educativo, mesmo se facilitasen aos seus alumnos libros ou artigos de escritorio, ou lles prestasen os servizos de media pensión ou internado, e mesmo que por excepción se vendan no mesmo establecemento os produtos dos obradoiros dedicados a dito ensino, sempre que o importe de dita venda, sen utilidade para ningún particular ou terceira persoa, se destine exclusivamente á adquisición de materias primas ou ao sostemento do establecemento.

f) As Asociacións e Fundacións de diminuídos físicos, psíquicos, sen ánimo de lucro, polas actividades de carácter pedagóxico, científico, asistencial e de emprego que para o ensino, educación rehabilitación e tutela de diminuídos realicen, mesmo que vendan os produtos dos obradoiros dedicados a dita fin, sempre que o importe de dita venda, sen utilidade para ningún particular ou terceira persoa, se destine exclusivamente á adquisición de materias primas ou ao sostemento do establecemento.

g) A Cruz Vermella Española.

h) Os suxeitos pasivos aos que lles sexa de aplicación a exención en virtude de Tratados ou de Convenios Internacionais.

2.- Os suxeitos pasivos aos que se refiren os parágrafos a), d), g) e h) do apartado anterior non estarán obrigados a presentar declaración de alta na matrícula do imposto .

3.- O Ministro de Facenda, establecerá en que supostos a aplicación da exención prevista no parágrafo c) do apartado 1 anterior esixirá a presentación dunha comunicación dirixida á Axencia Estatal de Administración Tributaria, na cal se fará constar que se cumpren os requisitos establecidos en dito parágrafo para a aplicación da exención. Dita obriga non se esixira en ningún caso ao ano seguinte ao posterior ao de inicio da súa actividade. A estes efectos, o Ministro de Facenda, establecerá o contido, o prazo e a forma de presentación de dita comunicación, así como os supostos en que haberá de presentarse por vía telemática.

En canto ás variacións que poidan afectar á exención prevista no parágrafo c) do apartado 1 anterior, estarase ao previsto no parágrafo 3º do apartado 2 do artigo 90 do R.D. Legislativo 2/2004 de 5 de marzo polo que se aproba o Texto Refundido da Lei 39/1988, de 28 de decembro Reguladora das Facendas Locais.

4.- As exencións previstas nos parágrafos b) ,e) e f) do apartado 1 deste Art. terán carácter rogado e se concederán, cando proceda, a instancia de parte.

Bonificacións

Artigo 5-.

Aparte das bonificacións previstas no Art. 88.1 do R.D. Legislativo 2/2004, poderán gozar de bonificacións acumulábeis na cota do imposto:

a) Os suxeitos pasivos que inicien o exercicio de calquera actividade empresarial, e tributen por cota municipal, a partir do momento de entrada en vigor da presente Ordenanza, durante os cinco anos de actividade seguintes ao de conclusión do segundo período impositivo de desenvolvemento desta, de acordo coa seguinte táboa:

Período	Bonificación
1º ano	50%
2º ano	40%
3º ano	30%

4º ano	20%
5º ano	10%

A aplicación da bonificación requirirá que a actividade económica non se exercese anteriormente baixo outra titularidade dentro do termo municipal. Entenderase que a actividade exercese anteriormente baixo outra titularidade, entre outros, nos supostos de fusión, escisión ou achega de ramas de actividade.

O período de aplicación da bonificación caducará transcorridos cinco anos desde a finalización da exención prevista no parágrafo b) do Art. 3.1. da presente Ordenanza.

A bonificación aplicarase á cota tributaria, integrada pola cota da tarifa ponderada polo coeficiente de ponderación establecido no Art. 7 da presente ordenanza e o coeficiente de situación fiscal previsto no Art. 8 desta. No suposto de que resulte aplicable a bonificación a que alude o parágrafo a) do apartado 1 do Art. 88 do Real Decreto 2/2004, a bonificación prevista nesta letra aplicarase á cota resultante de aplicar a bonificación do citado parágrafo do apartado 1.

A bonificación establecida neste artigo é de natureza regrada e terá carácter rogado, debendo ser solicitada expresamente polo suxeito pasivo ante a entidade local que teña asumida a xestión tributaria do imposto, debendo achegarse ó tempo de presenta-la solicitude de bonificación, copia da declaración de alta do suxeito pasivo na matrícula do imposto.

b) Os suxeitos pasivos que tributen por cota municipal e que teñan incrementado o seu número de traballadores con contrato indefinido medio anual durante o período impositivo inmediato anterior ao da aplicación da bonificación, en relación co período anterior a aquel, gozarán da seguinte bonificación sobre a cota tributaria:

Incremento porcentual do nº de traballadores con contrato indefinido	Bonificación
Entre o 5,0% e o 10,0%	10%
Máis do 10,0% e até o 20,0%	20%
Máis do 20,0%	25%

D-0
09
150
P.
E.
C

A documentación acreditativa será a seguinte:

- Certificado/s da Tesouraría Xeral da Seguridade Social da vida laboral da empresa, acreditativo dos extremos especificados neste artigo e apartado.

- Fotocopia dos contratos laborais dos traballadores contratados no período impositivo inmediato anterior ao de aplicación da bonificación.

c) BONIFICACIÓN POR FOMENTO DO EMPREGO.

1.- Segundo o previsto no art. 88.2.e) do Real decreto legislativo 2/2004, do 5 de marzo, polo que se aprobou o Texto refundido da Lei reguladora das facendas locais, este Concello establece a bonificación de ata o 95 % sobre da cota tributaria do imposto a favor dos suxeitos pasivos que tributen por cota municipal e desenvolvan actividades económicas de especial interese municipal, por concorrer circunstancias que poñan de manifesto a creación de emprego, naqueles supostos nos que se implante unha nova actividade económica ou empresarial, ou que supoñan unha ampliación das súas instalacións preexistentes sempre e cando tal ampliación implique a creación de emprego.

2.- Dado que a presente bonificación é análoga á prevista no artigo 4 da Ordenanza Fiscal nº 24 deste Concello, reguladora do Imposto sobre construcións, instalacións e obras, estarase, a efectos da concesión da mesma, aos mesmos requisitos, referidos á acreditación da creación de emprego, previstos na mesma, e, xa que logo, á porcentaxe de bonificación que se acede segundo a puntuación total que, segundo o orzamento de execución das obras ou instalacións, e o número de postos de traballo creados, se outorgue á actividade económica ou empresarial aos efectos da bonificación no ICIO, e ao seu medio de solicitude e xustificación. A bonificación limitarase á cota

municipal sobre o inmovible, non estendéndose a outros establecementos que teñan cota tributaria separada dentro do termo municipal.

3.- A solicitude da bonificación no ICIO suporá que se teña por solicitada a bonificación no Imposto sobre Actividades Económicas, polo que se estará aos requisitos de solicitude previstos no ICIO. A tramitación será conxunta, polo que non procederá solicitar a bonificación no IAE se non se ten solicitado a bonificación por fomento do emprego local prevista no ICIO.

4.- A bonificación no IAE surtirá efectos a partires do exercicio seguinte ao do remate das obras ou instalacións obxecto de bonificación no ICIO, e perdurará durante os TRES primeiros exercicios de exercicio da actividade. A mesma é simultaneable con calquera outra bonificación do IAE.

5.- O acordo de concesión da bonificación corresponderá ao Pleno da Corporación, que acordará, simultaneamente, o dereito ao seu desfrute coa tramitación da bonificación no ICIO e no IBI.

6.- Os novos postos de traballo creados que deran dereito á concesión do presente beneficio fiscal deberanse manter durante os tres períodos impositivos de duración da bonificación. De se mermar a plantilla durante o devandito período, perderase o dereito a seguir desfrutando da bonificación. A tal efecto, o suxeito pasivo deberá acreditar, a requerimento desta entidade local, os empregados existentes ao inicio da actividade e durante todo o período do beneficio fiscal. De se producir reducións de plantilla, o suxeito pasivo estará obrigado a poñelo en coñecemento desta entidade no prazo de UN MES desde que se tivese producido a redución.

7.- A perda do dereito á bonificación surtirá efectos no exercicio fiscal seguinte á súa produción.

Suxeitos pasivos

Artigo 6º.

Son suxeitos pasivos deste imposto as persoas físicas ou xurídicas e as entidades ás que se refire o Art. 35.4 da Lei Xeral Tributaria 58/03, sempre que realizan neste termo municipal calquera das actividades que orixinan o feito imponible.

Cota tributaria

Artigo 7º.

1.- A cota tributaria será a resultante de aplicar as tarifas do Imposto, de acordo cos preceptos contidos no R.D. Legislativo 2/2004 e nas disposicións que a complementen e desenvolvan, e os coeficientes e bonificacións previstos por Lei e, no seu caso, acordados polo Concello e regulados na Ordenanza.

O Art. 85 do R.D. Legislativo 2/2004 regula o réxime de aprobación, exacción e modificación das tarifas municipais, provinciais e nacionais do Imposto.

Coeficientes de ponderación

Artigo 8º.

De conformidade co previsto no Art. 86 do R.D. Legislativo 2/2004 , sobre as cotas municipais, provinciais e nacionais fixadas nas tarifas do Imposto, aplicarase, en todo caso, un coeficiente de ponderación determinado en función do importe neto de cifra de negocios do suxeito pasivo. O coeficiente de ponderación de aplicación en cada caso recóllese no seguinte cadro:

Importe neto de cifra de negocios	Coeficiente
Desde 1.000.000,00 € até 5.000.000,00 €	1,29
Desde 5.000.000,01 € até 10.000.000,00 €	1,30
Desde 10.000.000,01 € até 50.000.000,00 €	1,32
Desde 50.000.000,01 € até 100.000.000,00 €	1,33
Máis de 100.000.000,00 €	1,35
Sen cifra neta de negocio	1,31

Aos efectos da aplicación do coeficiente ao que se refire este artigo, o importe neto da cifra de negocios do suxeito pasivo será o correspondente ao conxunto de actividades económicas exercidas polo mesmo e determinarase de acordo có previsto no parágrafo d) do Art. 82.1 do R.D. Legislativo 2/2004.

Coeficientes de situación fiscal

Artigo 9º.

1.- Aos efectos previstos para a aplicación da escala de coeficientes que ponderan a situación física do local do apartado 4 seguinte, atenderase á clasificación por zonas recollida no Anexo da Ordenanza Fiscal Xeral municipal, entendéndose categoría como sinónimo de zona a todos os efectos desta ordenanza.

2.- As vías e tramos de vías públicas que non aparezan sinaladas no citado Art. serán consideradas como da categoría co coeficiente máis baixo, permanecendo así cualificadas até o 1 de xaneiro do ano seguinte a aquel en que se aprobe polo Pleno da Corporación á categoría correspondente e se inclúa no índice de vías públicas.

3.- Para todas as actividades exercidas neste termo municipal, e suxeitas ao Imposto de Actividades Económicas, establécense sobre as cotas modificadas pola aplicación do coeficiente de ponderación previsto no Art. 86 do Texto Refundido da Lei Reguladora de Facendas Locais, atendendo á categoría da vía pública onde radique, a aplicación da seguinte escala de coeficientes de situación fiscal:

Categoría ou zona	8 (industrial)	1, 2 e 3	4, 5 e 6	7 (rural)
Coeficiente de situación fiscal	2.00	1,66	1,47	1,23

4.- A aquelas actividades que tributen por cotas provinciais ou nacionais, non lles serán aplicábeis nin o coeficiente de ponderación nin o coeficiente de situación fiscal regulados nesta ordenanza.

Período impositivo e de reporte

Artigo 10º.

1.- O período impositivo coincide co ano natural, agás cando se trate de declaracións de alta, en cuxo caso, abranguerá desde a data de comezo da actividade até o final do ano natural.

2.- O imposto reportarase o primeiro día do período impositivo e as cotas serán irredutíbeis, agás:

a) Cando nos casos de declaración de alta o día de comezo da actividade non coincida co ano natural, en cuxo caso as cotas calcularanse proporcionalmente ao número de trimestres naturais que restan para finalizar o ano, incluído o de comezo do exercicio da actividade.

b) Nos casos de baixa por cese no exercicio da actividade, en cuxo caso as cotas serán rateábeis por trimestres naturais, excluído aquel en que se produza dito cese. A tal fin, os suxeitos pasivos poderán solicitar a devolución da parte da cota correspondente aos primeiros trimestres naturais nos que non se exercera a actividade.

3.- Tratándose de espectáculos, cando as cotas estean establecidas por actuacións illadas, o reporte prodúcese pola realización de cada unha delas, debéndose presentar as correspondentes declaracións na forma en que se estableza regulamentariamente.

Normas de xestión do imposto

Artigo 11º.

1.- A liquidación e recadación, así como a revisión dos actos ditados en vía de xestión tributaria deste imposto, levaranse a cabo polo Concello e comprenderán as funcións de concesión e

denegación de exencións e bonificacións, realización das liquidacións conducentes á determinación das débedas tributarias, emisión dos instrumentos de cobro, resolución dos expedientes de devolución de ingresos indebidos, resolución dos recursos que se interpoñan contra ditos actos, e actuacións para a información e asistencia ao contribuínte referidas ás materias comprendidas neste parágrafo.

2.- As solicitudes para o recoñecemento de beneficios fiscais deben presentarse na administración municipal, debendo ir acompañadas da documentación acreditativa das mesmas. O acordo polo que se acceda á petición solicitada fixará o exercicio desde o cal o beneficio se entende concedido.

3.- Contra os actos de xestión tributaria, competencia do Concello, os interesados poden formular recurso de reposición no prazo dun mes, a contar desde a notificación expresa do acto cuxa revisión se solicita ou a exposición pública dos correspondentes padróns ou matriculas ou obrigados ao pagamento.

4.- A interposición de recurso de reposición non suspenderá a execución do acto impugnado, coas consecuencias legais conseguintes, incluso a recadación de cotas ou dereitos liquidados, intereses e cargos. Os actos de imposición de sancións tributarias quedarán automaticamente suspendidos conforme ao previsto na Lei Xeral Tributaria e na Lei de Dereitos e Garantías do Contribuínte.

Non obstante, e nos mesmos termos que no Estado, poderá suspenderse a execución do acto impugnado, entanto dure o substanciamento do recurso, aplicando o establecido no R.D. 2244/1979 de 7 de setembro, polo que se regulamenta o recurso de reposición previo ao económico-administrativo coas seguintes especialidades:

En todo caso será competente para tramitar e resolver a solicitude o órgano da Entidade Local que ditou o acto.

As resolucións desestimatorias da suspensión só serán susceptíbeis de impugnación na vía contencioso-administrativa.

Cando se interpoña recurso contencioso-administrativo contra a resolución do recurso de reposición, a suspensión acordada en vía administrativa manterase, sempre que exista garantía suficiente, até que o Órgano Xudicial competente adopte a decisión que corresponda en relación con dita suspensión.

Contra a resolución do recurso de reposición non pode interpoñerse de novo este recurso, podendo os interesados interpor directamente recurso contencioso-administrativo, todo ilo sen prexuízo dos supostos nos que a Lei prevé a interposición de reclamacións económico-administrativas contra actos ditados en vía de xestión dos tributos locais.

Porén, en casos excepcionais, a Alcaldía pode acordar a suspensión do procedemento, sen presentación de garantía, cando o recorrente xustifique a imposibilidade de presentala ou demostre con fe a existencia de erros materiais na liquidación que se impugna.

O período de cobro para valores-recibo notificados colectivamente fixarase no momento de aprobar o Padrón de Contribuíntes.

As liquidacións de ingreso directo terán de ser satisfeitas nos períodos fixados polo Regulamento Xeral de Recadación, que son:

- Para as notificacións efectuadas na primeira quincena do mes, até o día 5 do mes natural seguinte.
- Para as notificacións efectuadas na segunda quincena do mes, até o día 20 do mes natural seguinte.
- Transcorrido o período voluntario de cobro sen ter efectuado o ingreso, abrirase a vía de prema e se aplicará un cargo do 20%.

Na exacción dos tributos locais e dos restantes ingresos de Dereito Público das Entidades Locais, os cargos e xuros de demora esixiranse e determinaranse nos mesmos casos, forma e contía que na exacción dos tributos do Estado.

Infracción e sancións

Artigo 12º.

En materia de tributos locais, aplicarase o réxime de infraccións e sancións regulado na Lei Xeral Tributaria e nas disposicións que a complementen e desenvolvan, coas especificacións que resulten da presente Lei e as que, no seu caso, se establezan nas Ordenanzas Fiscais ao amparo da Lei.

Comprobación e investigación

Artigo 13º.

Nos temos que regulamentariamente se estableza pola Administración Tributaria do Estado, o Concello recadará para si as funcións de inspección do Imposto sobre Actividades Económicas, que comprenderán a comprobación e investigación, a práctica das liquidacións tributarias que no seu caso procedan e a notificación da inclusión, exclusión ou alteración dos datos contidos nos censos, todo ilo referido, exclusivamente, aos supostos de tributación por cota municipal.

Delegación de facultades

Artigo 14º.

O Concello delegou na Deputación Provincial da Coruña as facultades referidas nos Arts. 11 e 13 desta Ordenanza, as normas contidas nos devanditos artigos serán aplicábeis ás actuacións que deba efectuar a Administración delegada.

DISPOSICIÓN TRANSITORIA

Os suxeitos pasivos do imposto que teñan concedido a bonificación pola introdución do beneficio fiscal contido no artigo 5.c) dentro dos últimos catro anos anteriores á entrada en vigor da modificación da presente Ordenanza, terán dereito á aplicación retroactiva, no Imposto sobre Actividades Económicas, durante os tres primeiros exercicios de inicio da actividade, do beneficio fiscal establecido na mesma porcentaxe que se lles tivera recoñecido no ICIO, sempre e cando se manteña o dereito á bonificación, e de se seguir cumprindo, durante os devanditos exercicios, os requisitos previstos no seu artigo 4, polo que procederá, no seu caso, a devolución de ingresos previa solicitude ao efecto do suxeito pasivo.

Disposición final. Vixencia e aprobación

A Presente Ordenanza entrará en vigor o día da súa publicación no Boletín Oficial da Provincia, e será de aplicación no exercicio de 2.008 permanecendo en vigor até que se acorde a súa modificación ou derogación.

A modificación do artigo 5 e Disposición Transitoria aprobada inicialmente en sesión plenaria do 07.06.2018 entrará en vigor o 1 de xaneiro de 2019.”